

Katerisimaartarnernut aamma ininut kikkunnit tamanit iserfigineqarsinnaasunut killilersuinerit pillugit Namminersorlutik Oqartussat nalunaarutaat (Immikkoortoq 2)

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6 aamma 12 b, aamma § 29, imm. 2 malillugit aalajangersarneqarput:

Atuuffiata killilerneqarnera

§ 1. Nalunaarummi §§ 3 aamma 4 katerisimaartarnernut naalakkersuinikkut allatulluunniit isummernissamik siunertalinnut atuutinngillat.

Imm. 2. Nalunaarummi § 5 napparsimavinnut, nakorsiartarfinnut, nakorsiartarfinnut namminersortunut imaluunniit niuertarfinnut peqqissaanermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutinngilaq.

Imm. 3. Nalunaarut ulluunerani neqeroorutinut namminersortunut pisortaniillu pigineqartunut, atuarfinnut, ilinniarfeqarfinnut il.il. atuutinngilaq, nappaatit tunillaassortut akiorniarlugit iliuutsit pillugit Inatsisartut peqqussutaanni § 22 takuuk.

Imm. 4. Nalunaarut eqqartuussisut pissaanermik atortitsinerannut atuutinngilaq.

§ 2. Nunatsinnut tikittut Covid-19-imut tamakkiisumik akuiussutissamik kapitinnermik uppersaasiinnaasut § 3-mi imaluunniit § 4-mi, imm. 3-mi ilaatinneqanngillat.

Imm. 2. Inuk Covid-19-imut tamakkiisumik akuiussuserneqarsimasutut isigineqassaaq inuup akuiussuserneqarsimanerup ingerlarngata naammassisimaneranik uppersaasiinnaappat. Nunatta Nakorsaaneqarfiata akuiussuserneqarsimanermit uppersaasatit sorliit akuerisaanersut aalajangissavai.

Aaqqissuussinernik il.il., peqataaniarnermi nunanit allanit angalaqqaarluni peqataaffigineqarsinnaasunik inerteqquteqarneq

§ 3. Illup iluani silamilu aaqqissuussanik, nalliuttorsiornermik, sammisaqartitsinernik assigisaannilluunniit ingerlataqarnerit, nalinginnaasumik aaqqissuussamut peqataaniarnermi nunanit allanit angalaqqaarluni peqataaffigineqarsinnaasut taamatulluunniit naatsorsuuteqarfigineqartut inerteqqutaapput, taamaattorli imm. 2 takuuk.

Imm. 2. Aaqqissuussani, nalliuttorsionerni, sammisaqartitsinerni assigisaanniluunniit peqataanissamut nalunaarnissamik piumasaqaatilinni inuit nunanit allaneersut imaluunniit naalagaaffeqatigiinnerup ilaaneersut tikinnermiit ulluni 14-ni suillerni aaqqissuussamut, nalliuttorsionermut, sammisaqartitsinermut assigisaannuluunniit peqataasussatut nalunaarsorsinnaannginnissaat aaqqissuussisup qulakkiissavaa, taamaattorli imm. 2 takujuk. Imm. 1 malinneqarpat, taava aaqqissuussaq il.il ingerlanneqarsinnaavoq.

Imm. 3. Pikkorissartitsinerit, isumasioqatigiinnerit assigisaallu imm. 2-mi ilaapput.

Imm. 4. Namminerisamik aaqqissuussat, soorlu assersuutigalugu kuisitsinerit, inuuissiornerit, apersortinnerit, soraarummeertoqarneranut atatillugu nalliuttorsioartitsinerit, katinnerit ilisinerillu imm. 1-imi aammalu 2-mi ilaanngillat.

Aaqqissuussinernut il.il kommuninit allanit angalalluni peqataaffigineqartussanut piumasaqaatit

§ 4. Illup iluani silamilu aaqqissuussat, nalliuttorsionerit, sammisasaqartitsinerit assigisaalluunniit nalinginnaasumik aaqqissuussanut peqataaniarnermi kommuninit allanit angalaqqaarluni peqataaffigineqarsinnaasut taamatulluunniit naatsorsuuteqarfigineqartut inerteqqutaapput, taamaallaat piumasaqaatit tulluuttut malinneqarpata ingerlanneqarsinnaapput:

Aaqqissuussineq il.il. sioqqullugu ulluni 30-ni illoqarfimmi, nunaqarfimmi imaluunniit piffimmi aaqqissuussamik ingerlatsiffusussami Covid-19-imik tunillatsittoqarsimanngippat.

Imm. 2. Aaqqissuussami il.il. inuit 50-it sinnerlugit peqataassappata aaqqissuussinerup il.il. ingerlanneqarnera sioqqullugu aaqqissuussisoq allakkatigut ingerlariaatsimik piareersaassaaq ukulu qulakkiissallugit:

1) Inuit Covid-19-imik tunillatsissimanermut ersarittumik ersiutillit aaqqissuussanut il.il.

peqataatinneqaqqusaannginnerat.

2) Peqataasut minnerpaamik 2 miiterinik imminnut ungasitsiginissaat, tamanna aaqqissuussinerup il.il. ingerlanneqarnissaanut akornutaanngippat.

3) Aaqqissuussami il.il. peqataasut Covid-19-imik tunillatseratarsinnaanerannik pasitsaassaartoqarpat, taava Coronamut Allattoqarfik ingerlaannaq attavigineqassaaq.

Imm. 3. Aaqqissuussanut il.il. peqataanissamut nalunaarnissamik piumasaqaatilinnut aaqqissuussisup qulakkiissavaa, inuit peqataaniarlutik nalunaarusuttut tassunga ilanngullugit oqallinnissamut tunngavissianik saqqummiisut aamma ilinniartitsisut aaqqissuussineq sioqqullugu ullut 14-nit iluanni Kalaallit Nunaannut tikissimappata aaqqissuussamut peqataasinnaannginnissaat nalunaarsinnaannginnissaallu, taamaattorli imm. 2 takujuk.

Imm. 4. Aaqqissuussamut il.il. peqataasut tamarmik peqataareernerup kingorna angerlannginnerminni misissorneqaqqaassapput, illoqarfimmi, nunaqarfimmi imaluunniit piffimmi aaqqissuussamik ingerlatsiffusumi Covid-19-imik tunillatsittoqarsimasoq paasineqarpat.

Imm. 5. Aaqqissuussamik il.il. aaqqissuussisusup aaqqissuussap il.il. nalunaarummi matumani malittarisassat tamaasa naapertorlugit ingerlanneqarnissaa qulakkiissavaa.

Imm. 6. Taamatutaaq pikkorissartitsinerit, isumasioqatigiinnerit assigisaallu imm. 1-5-imi ilaapput.

Imm. 7. Namminerisamik aaqqissuussinerit, soorlu kuisitsinerit, inuuissiornerit, apersortinnerit aamma soraarummeertoqarneranut atatillugu nalliuttorsioartitsinerit, katinnerit ilisinerillu imm. 1-imi, 2-mi 3-milu ilaanngillat.

Imm. 8. Nunatta Nakorsaaneqarfia imm, 1-imiit 5 ilanngullugu immikkut akuersissuteqarsinnaavoq, pissutsinik piviusunik tamanna tunngavilersorneqarsinnaappat.

Ininut kikkunnilluunniit iserfigineqarsinnaasunut piunasaqaatit

§ 5. Inuit aamma inatsisit naapertorlugit ingerlatsiviusut, tassunga ilanngullugu pisortat oqartussaaffii aamma suliffeqarfii, ininik kikkunnit tamanit iserfigineqarsinnaasunik pigisallit piunasaqaatinik makkuninnga naammassinnissimassapput:

- 1) Inimi ininiluunniit tamanit iserfigineqarsinnaasuni eqqiliusaarnissaq ileqqorissaarnissarlu pillugit Nunatta Nakorsaaneqarfianiit paasissutissanik nivinngaasoqassaaq.
- 2) Sulisut tamarmik Nakorsaaneqarfup eqqiluisaaqqissaarnissamik ileqqorissaarnissamillu innersuussutaanik malinninnissaat qulakkeerpeqassaaq.
- 3) Pisisartunut pulaartunullu ajornanngippat imermik qaqorsaammillu imaluunniit assammut spritimik peqassaaq.
- 4) Nerisassanik poortorneqarsimanngitsunik tuniniaanermi sulisut aqqateqassapput.

§ 6. Inuussutissarsiummik ingerlatalik politiit naliliinerat malillugu § 5-imik unioqutitsisimappat, inuussutissarsiummillu ingerlatalik § 5-imik malinninnissaa ilimagineqanngippat, inuussutissarsiummik ingerlatalik inip piffissami aalajangersimasumi tamanut matoqqatinnissaanik politiinit peqquneqarsinnaavoq.

Pineqaatissiissuteqartarneq

§ 7. §§ 3-5-imik unioqutitsisoq imaluunniit § 6 malillugu peqqussummik unioqutitsisoq pinerluttulerinermik inatsit malillugu pineqaatissinneqarsinnaavoq.

Imm. 2. Ingerlatseqatigiiffiit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Imm. 3. Akiliisitsissutit Nunap Karsianut tutsinneqassapput.

Atuutilersitsineq, atorunnaarsitsineq piffissarlu atuuffissaq

§ 8. Nalunaarut ulloq 1. juli 2021-mi atuutilissaaq.

Imm. 2. Ilutigisaanik Katerisimaartarnernut aamma ininut kikkunnit tamanit iserfigineqarsinnaasunut killilersuigallarnerit pillugit Namminersorlutik Oqartussat nalunaarutaat nr. 20, 21. maj 2021-meersoq (Immikkoortoq 1) atorunnaarsinneqarpoq.

Imm. 3. Nalunaarut malillugu killilersuinerit, inerteqquteqarnerit, peqqusinerit il.il. 31. august 2021 ilanngullugu atuutissapput.

Kirsten Fencker
Peqqinnissamut Naalakkersuisoq

/ Aka Olesen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut